

Iniziativa è privulusa: Betg destruir il cumprovà

Il comité grischun ha preschentà ses arguments cunter l'iniziativa «Pro servis public»

DA MARTIN CABALZAR

■ La Svizra dispona d'ina infrastruttura e d'in provediment da basa singular sin quest mund. Cun l'iniziativa «Pro servis public» vegnia quest model da success dentant periclità massivamain. Quai è l'avis dal comité grischun che cumbatta l'iniziativa. A quel appartegnan exponents dals cristian-democrats, socialdemocrats, verd-liberals, burgais-democrats e liberals. Dal copresidi grischun cunter l'iniziativa fan part cusseglier naziunal *Martin Candinas* (pcd), deputà *Peter Peyer* (ps), la presidenta dals verd-liberals da Cuira *Salome Mathys*, il deputà e parsura da la Partida burgais-democratica *Andreas Felix* ed il deputà e president da la Partida liberala *Bruno Claus*.

Betg periclità il servis public funcziunont e cumprovà

Cusseglier naziunal Martin Candinas conceda che l'iniziativa «Pro servis public» haja in num attractiv, las consequenzas d'ina acceptanza fissian dentant desastrusas. Empe da rinforzar il servis public effectueschia l'iniziativa gist il cuntrari, ella flaiventia quel massivamain. Per quest motiv appelleschan las partidas grischunas (sulet la pps na era betg da la partida a la conferenza da medias) da refusar questa iniziativa. L'iniziativa «Pro servis public» scumonda als manaschis parentads cun la confederaziun da far gudogns e d'applicar subvenziuns traversas. Quai fissia dubel destructiv, punctuescha Candinas. Senza gudogns n'hajan ins numnadamain betg a disposiziun ils meds necessaris per garantir la finanziaziun dal provediment da basa da buna qualitat. Er il scumond da subvenziuns traversas fissia catastrofal, cunzunt per las regions ruralas e muntagnardas, accentuescha il cusseglier naziunal da la pcd. In provediment da basa integral senza subvenziuns traversas na saja betg resalistic. Ils iniziants empermettjan dapli



Comité cunter l'iniziativa «Pro servis public»: da san. Bruno Claus (pld), Andreas Felix (pbd), Salome Mathys (vl), Peter Peyer (ps) e Martin Candinas (pcd). FOTO O. ITEM

qualitad per pretschs pli bass. Quai saja a prima vista simpatic, l'iniziativa na possa dentant betg tegnair quai ch'ella empermettia. Empe da meglierar noss servis public vegnia quel donnegià enormamain. Sco represchentant d'ina regiun muntagnarda saja el interessà d'avair in ferm servis public en tut las domenas statals. L'iniziativa na saja «betg mo ina pir-la amara, mabain bleranz ina medischina nuschaivla», concluda l'expert da segiradas ses votum.

Buns posts da lavur en il Grischun èn periclitads

Deputà Peter Peyer punctuescha che nus hajan da decider davart il text d'iniziativa e betg davart quai ch'ils iniziants raquantan posteriuramain. Il text d'iniziativa pretendia expressivamain che «las pajas ed ils onuraris da las collavuraturas e dals collavuratur da questas interpresas na dastgan betg esser pli auts che quels da l'administraziun federala». En il text d'iniziativa na legian ins dentant nagut

da salaris exorbitans da managers, l'iniziativa saja perquai in'attatga frontala cunter las cundiziuns d'engaschament dals postins, dals locomotivists e dals informatichers da la Swisscom. Ord optica dals sindicats na saja l'iniziativa betg mo in privel per il provediment da basa, anzi era privlusa per ils lavurers occupads en il servis public en general. Posta, Swisscom e VFF sajan impurtants patrums per l'entira Svizra. Questas trais interpresas porschian paun e gudogn a passa 100 000 personas e quai – grazia als contracts da lavur globals – per las medemas cundiziuns e quai en l'entira Svizra.

Mategnair il provediment da basa en il Grischun

Tenor la verd-liberala Salome Mathys è l'iniziativa in «luf en pail nursa» u in «engion d'etichetta». Ils iniziants sugereschian ch'il servis public haja actualmain grondas flaivezzas e che tut vegnia meglier cun acceptar l'iniziativa. Noss provediment public saja gia uss excellent e

funcziuneschia bain, er en cumparegliaziun internaziunala, punctuescha Mathys. Sche las interpresas numnadas na possian betg pli far gudogn sajan ellas sfurzadas da reducir lur prestaziuns e da renunziar a novas investiziuns. Per la confederaziun muntassia l'iniziativa ina perdita finanziaria da radund ina milliarda che stoppia alur vegnir compensada cun mesiras cun consequenzas dramáticas. En il mender cas stoppian ins serrar ulteriuras postas, stritgar lingias da viafier e da bus postal e renunziar a la cumplettaziun da la rait da telecomunicaziun. Gist quai muntassia dentant ina reduziun sensibla da la qualitat da viver e d'attractivitat da nossas regions muntagnardas e saja perquai inacceptabel.

Augment da las taglias per confederaziun, chantun, vischnancas

Per Andrea Felix purtass l'iniziativa ina reduziun marcanta da las entradas da taglia da confederaziun, chantun e vischnancas. L'onn 2013 haja il maun pu-

blic numnadamain profità da radund 1,2 milliardas dals manaschis da servis public en furma da taglias e participaziuns al gudogn. Da quai haja betg l'ultim er il Grischun profità essenzialmain. La perdita da questas summas muntia che las interpresas na pudessan betg pli investir en las regions periferas cun pitschnas frequenzas. Era per las finanzas chantunalas avessia l'iniziativa consequenzas gravantas, damai che 40 pertschient da las entradas dal chantun vegnan da Berna.

Iniziativa è da donn per l'economia

«Per l'economia èn bunas infrastrukturas ed in provediment da basa bain funcziunont premissas indispensablas», ha punctuà Bruno Claus. Senza in bun provediment da basa na saja l'economia svizra betg cumpetitiva sin il martgà internaziunal. La privatisaziun dals manaschis dal servis public saja sa cumprovada, l'iniziativa effectuaschia ina nova burocracia che limiteschia la libertad d'agir da las interpresas e saja perquai da refusar.